



Zavičajni Klub Zapadna Bosna
10153 Squire Meadows Dr.
St. Louis, MO 63123, USA
(314) 398-2879 | zkzbstl@gmail.com | www.zkzb.org

Javno obraćanje povodom održanog 26. Krajiškog Teferića 15-16. augusta 2025. godine u Saint Louisu, država Missouri, SAD.

Dragi Krajišnici i zemljaci, ostali gosti, želimo da vas srdačno pozdravimo i zahvalimo svima koji su učestvovali u ovoj manifestaciji, bilo da su svoj doprinos dali u radu, donacijama, sponzorstvu ili da su svojim prisustvom uveličali ovo okupljanje.

Na samom početku kratak osvrt na organizaciju 26. Krajiškog Teferića.

Nakon što je organizacija ovogodišnjeg teferića dodijeljena Zavičajnom Klubu Zapadna Bosna, dalje planiranje i pripreme za realizaciju je pripalo rukovodstvu imenovane zajednice. Pripreme su se odvijale prema predviđenom planu i programu bez značajnih problema i propusta. Kako su mnogi građani prepoznali rad organizatora, veliku podršku u svom radu klub je dobio kako od Krajišnika mještana grada domaćina, tako i od ostalih zemljaka i građana u našem gradu, a i širom Amerike i Kanade. Da je tako govori činjenica da se u volonterski rad za realizaciju 26. Krajiškog Teferića prijavilo preko 80 osoba volontera, kao i veliki broj sponzora koji su svoje donacije dali u materijalnim ili novčanim sredstvima. Svi zainteresovani mogli su da prate svaki detalj dešavanja na zvaničnoj web stranici www.zkzb.org

Moramo istaći da 26. Krajiški Teferić nije pod utjecajem niti predstavlja interese bilo koje političke partije niti pojedinca, već zastupa pravilnikom definisane ideje i ciljeve Krajiškog Teferića na kojima je zasnovan i obilježava period egzodusa naroda Autonomne Pokrajine Zapadna Bosna, koji se desio 1994. i 1995. godine prošlog stoljeća, s ciljem okupljanja, druženja, upoznavanja i povezivanja doseljenika iz Krajine, njihovih zemljaka i prijatelja širom svijeta, promovišući kulturu, tradiciju i sport.

Predviđenim protokolom organizacije upućeni su pozivi za prisustvo na 26. Krajiškom Teferiću na sljedeće institucije, i to: općinski organ, ured načelnika Općine Velika Kladuša u BiH, Generalni konzulat BiH u Chicagu, Ambasada BiH u Washingtonu, Ured za stalnu misiju BiH pri UN-u u New Yorku, Ured St. Louis City, St. Louis County, Ured Mayor of St. Louis, kao i pismo podrške organizatoru 21. Krajiškog Teferića u domovini – mjesna zajednica Vrnograč. Od navedenih institucija dobili smo povratno pismo podrške za organizaciju od gospodina doktora Zlatka Lagumdžije ispred Ureda stalne misije BiH pri UN-u u New Yorku, gospodina Sam Page, St. Louis County, dok podršku ličnim prisustvom na 26. Krajiškom Teferiću dala generalna konzulica BiH u Chicagu gospođa Tatjana Telić, gdje je svojim prigodnim obraćanjem pozdravila prisutne, pružila podršku ovoj manifestaciji i zahvalila se organizatoru za poziv, te izrazila zadovoljstvo zbog svog prisustva na ovom okupljanju. Gospođi Telić se i ovim putem zahvaljujemo na odazivu.

Program 26. Krajiškog Teferića je realiziran kroz tri aktivnosti i to:

1. -Petak, 15. august 2025. godine – Večernja zabava

Održana u Greenfelder Recreation Complex na adresi 550 Weidman Rd, Ballwin, MO.

Programom večernje zabave obuhvaćeno je: doček gostiju i druženje uz muzički sadržaj DJ Amel Račić, održano je izvlačenje parova za sutrašnji turnir kao i Okrugli stol 26. KT.

Učešće na Okruglom stolu dali su predstavnici svih šest gradova organizatora prethodnih teferića. Sastanak je predvodio predsjednik ZKZB ispred organizatora 26. Krajiškog Teferića, Zlatko Husidić-Solaja. Na sastanku je jednoglasno usvojen ponuđeni Pravilnik Krajiških Teferića sa akcentom na mogućnost dorade ukoliko prisutni predstavnici upute prijedloge pismenim putem na ime rukovodioca ovog Okruglog stola, koji je od prisutnih zadužen za dalju doradu navedenog pravilnika.

Na okruglom stolu je iznesena ponuda za organizaciju 27. Krajiškog Teferića, koja je došla od strane NK Krajišnik iz Utice, New York. Ista je jednoglasno prihvaćena od strane svih prisutnih i data je podrška sljedećem organizatoru za organizaciju sljedećeg teferića.

Druženje je proteklo u izuzetnoj atmosferi, prisutni obradovani novim susretima. Tokom večeri prisutni su mogli da uživaju u ponuđenom izboru hrane i pića koje je organizator obezbijedio po veoma pristupačnim cijenama.

2. -Subota, 16. august 2025. godine – Dnevni program ili glavni program 26. Krajiškog Teferića

Održan je u Creve Coeur Park Soccer Complex na adresi 2350 Creve Coeur Mill Rd, Saint Louis, Missouri.

Sportska aktivnost 26. Krajiškog Teferića je sažeta u malonogometnom turniru. Takmičenje u malom nogometu je započelo u 8:00 i trajalo je do 15:30 razigravanjem finalne utakmice turnira 26. KT.

Natjecanje ekipa se odvijalo u dvije kategorije i to: prva kategorija Adult Open (Under 40) sa 16 prijavljenih ekipa i druga kategorija Veterani (Over 40), čiji sastav je činilo prijavljenih 12 ekipa veterana.

Prva kategorija je igrala u četiri grupe po sistemu „svako sa svakim“, gdje je završni plasman bio sljedeći:

- ✓ Prvo mjesto – AA/Vidovska, St. Louis, MO
- ✓ Drugo mjesto – NK BiH, Saint Louis, MO
- ✓ Treće mjesto – Zmajevi, Chicago, Illinois

Druga kategorija se takmičila u tri grupe po istom sistemu, a rezultat je bio sljedeći:

- ✓ Prvo mjesto – Krajišnik, Saint Louis, Missouri
- ✓ Drugo mjesto – Rođeni, Milwaukee, Wisconsin
- ✓ Treće mjesto – Krajišnik, Chicago, Illinois

Obzirom da su uslovi za odigravanje turnira bili otežani zbog visoke dnevne temperature, ističemo da se turnir 26. Krajiškog Teferića odvijao u predviđenom vremenu i rasporedu, bez nepoželjnih istupa. Na terenu nije bilo zabilježenih ozbiljnih povreda niti prekršaja, tako da je sve proteklo u najboljem redu, u fer igri i sportskom druženju.

Ovim putem se zahvaljujemo svim prisutnima za učešće na turniru 26. Krajiškog Teferića, a pobjednicima čestitamo na zasluženju pobjedi.

Kulturno-zabavni program je počeo u subotu u 11:00 sati. Voditelji programa bili su Husidić Melisa i Buljubašić Rifet, koji su se tom prilikom obratili prisutnima s osvrtnom na značaj teferića uopće, sa naglaskom da ovogodišnji teferić ima poseban značaj jer njime obilježavamo tridesetu godišnjicu egzodusa naroda Autonomne Pokrajine Zapadna Bosna, te su se zahvalili svima na prisustvu. Nakon uvodnih riječi prisutnima se obratila i gošća Tatjana Telić, generalni konzul Bosne i Hercegovine u Chicagu, koja je pozdravila učesnike i u svom obraćanju se zahvalila na pozivu, podržala organizaciju, te istakla značaj ovakvih događaja za cjelokupnu BiH zajednicu na ovom kontinentu. Pozdravnim riječima prisutnima se obratio i predsjednik Zavičajnog Kluba Zapadna Bosna, Zlatko Husidić-Solaja, ispred organizatora 26. KT, zahvalio se na ukazanom povjerenju za organizaciju ovog značajnog događaja te se zahvalio svima koji su dali svoj doprinos u realizaciji ovog okupljanja.

Nakon uvodnog obraćanja, program 26. KT je nastavljen prezentacijom tradicionalnih kola i igara folklornih društava u kojem su se predstavili: KUD Đerdan iz Saint Louisa – grada domaćina, KUD Zlatnik iz Fort Waynea, država Indiana i KUD Krajiški Biseri iz Chicaga, Illinois. Zahvaljujemo se svim društvima za učešće na 26. Krajiškom Teferiču, čime su obogatili naš program, a samim tim prisutnima predstavili kulturu i tradiciju podneblja sa kojeg dolazimo. Ovim putem izražavamo podršku u njihovom daljem radu i pozivamo ostale roditelje da uključe svoju djecu u ova i ovakva društva, čime će doprinijeti očuvanju naše tradicije i kulture.

Tokom dnevnog zabavnog programa na binu su pozvani svi sponzori 26. Krajiškog Teferića u Silver, Gold i Platinum kategoriji i uručeni su im pokloni koje je organizator pripremio za iste.

Besplatna hrana, koja je obezbijedena od strane organizatora za sve prisutne na 26. KT, pripremljena je u velikom izboru i obimnim količinama. Isto tako, obezbijedena je i neograničena količina bezalkoholnog pića, dobro ohlađenog, kako bi svi prisutni lakše podnijeli visoke temperature koje su nas pratile cijelo vrijeme tokom dnevne aktivnosti 26. Krajiškog Teferića.

3. Subota, 16. august 2025. godine – Završna večernja zabava 26. KT
Mjesto održavanja: Greenfelder Recreation Complex, na adresi 550 Weidman Rd, Ballwin, MO. Vrijeme: od 18:00 do 24:00 (ponoć).

Ugodna atmosfera, za koju se pobrinuo muzički izvođač Adnan Sibonjić sa pratnjom velikog muzičkog umjetnika Sanela Bajramija, okupila je veliki broj gostiju. U predivnoj sali prisustvovalo je preko dvije hiljade gostiju, koji nisu krili svoje zadovoljstvo koje su doživjeli ovim susretom.

Tokom zabave pobjednicima su uručeni pehari za osvojena mjesta na turniru ovogodišnjeg teferića. Nakon toga proglašen je organizator 27. Krajiškog Teferića, te je istom uručena prelazna plaketa Krajiškog Teferića zajedno sa prelaznim peharima. Organizator sljedećeg teferića je NK Krajišnik Utica, New York i održat će se u njihovom gradu 15. augusta 2026. godine.

Ističemo i to da se organizator pobrinuo da cijena ulaza, kao i ponuđenog repertoara pića, bude prikladna, što je dodatno oduševilo sve posjetioce. Također, svi gosti su se mogli poslužiti besplatnom hranom, kolačima i kafom, koju su organizatori obezbijedili tokom večernje zabave.

Na kraju, kao šlag na tortu, dana 23. augusta 2025. godine održano je zajedničko druženje rukovodstva ZKZB, volontera i sponzora 26. Krajiškog Teferića u znak ispraćanja ovogodišnjeg teferića. Na ovo druženje odazvao se veći broj gostiju, članova navedenih grupacija, a druženje je proteklo u opuštеноj atmosferi gdje prisutni nisu krili zadovoljstvo zbog dobro odrađenog posla u realizaciji ovogodišnjeg teferića. Time je stavljena tačka na „i“, a 26. Krajiški Teferić je završen.

Dragi prijatelji, veliko nam je zadovoljstvo što smo bili domaćini i organizatori ovog značajnog događaja, na koji se odazvao veliki broj Krajišnika i zemljaka, kako onih iz grada domaćina, tako i gostiju širom Amerike i Kanade. Ovim gestom smo svi dokazali da nam je stalo do Krajiških Teferića – i mi domaćini koji smo izdvojili puno vremena i maksimum truda da bismo prigodno ugostili sve prisutne, i vi koji ste prešli velike puteve kako bismo se danas zajedno družili.

Zahvaljujemo se svim donatorima i sponzorima, koji su uzeli značajno mjesto u realizaciji 26. KT. Također se zahvaljujemo mnogobrojnim nogometnim ekipama učesnicima sportske aktivnosti. Zahvaljujemo se ekipi iz EX-YU Hunting & Fishing Club iz Waterloo, Iowa, koji su pravljеnjem lovačkog graha i gulaša dali svoj doprinos u pripremi hrane za ovaj događaj, kao i lokalnim BiH biznisima/ugostiteljima, koji su dali svoj doprinos u pripremi jednog dijela hrane bez ikakve naknade. Posebna zahvala pripada volonterima, predvođenim rukovodstvom ZKZB, koji su uzeli najbitnije mjesto u pripremi i realizaciji obimnih aktivnosti koje je iziskivala cjelokupna organizacija, počev od izrade prelijepe bine koja je krasila ovaj događaj, kao i pripreme i podjele obilne količine ukusne hrane i kolača, kafe i pića za sve prisutne. Veoma je bitno, i koristimo ovu priliku da se posebno zahvalimo ženama koje su uzele značajnu ulogu u cjelokupnoj realizaciji, kao i mladima ZKZB, koji su svojim učešćem dali nam dodatni motiv i uvjerenje da će Krajiški Teferići vječno živjeti.

Dragi naši Krajišnici i zemljaci, ostali gosti, bilo nam je zadovoljstvo i čast što smo opravdali vaše povjerenje. Do sljedećeg susreta. Vaši ZKZB

Predsjednik ZKZB: Husidić Zlatko-Solaja